


Stret Fasin blong wok wetem Totel – Ol Rul blong wok folem long saed blong turisim



Contents

Stret Fasin blong wok wetem Totel – Ol Rul blong wok folem long saed blong turisim	3
Smol advaes/ jenerol advaes	4
Ol aktiviti long solwota – swimswim, snokel mo daeva	5
Tua long sanbij blong ol nes blong totel	6
Lukluk ol bebe totel	7
Lukluk ol totel long skae kam daon	7
Ol hotel, risot mo bangalow we oli stap kolosap long ples blong totelat	8
Turisim mo kastom long saed blong totel	8
Konsevesen blong totel long saet blong turisim long Vanuatu	8
Ol nogud fasin blong turisim long saed blong totel	9
Ol loa blong Vanuatu hemi protektem ol totel	10
Appendix	10



Stret Fasin blong wok wetem Totel

– Ol Rul blong wok folem long saed blong turisim


Ol totel hemi wan long ol spesel animol we umi save luk long solwota , long Vanuatu, yumi gat 4 kaen totel, Hoksbill, Grin, mo Letabak. Ol totel ia oli stap kam sor long sanbij blong mekem nes mo putum ek blong olgeta long taem blong bigfala ren (oktoba kasem maj). Ol Lokahed oli stap kam samsam taem mo from Solwota blong Vanuatu i klea gud i gim janis long ol manples mo ol turis blong save luk ol totel.

I gat plante man we oli stap travel blong kam long ol naesfala ples olsem Vanuatu, mekem se i gat bigfala janis blong mekem turisim long saed blong totel. Be wetem kaen turisim olsem i save spolem ol totel, sapos yumi no lukaotem gud olgeta. Namba blong evri kaen totel oli stap go daon hariap mo yumi save lusum olgeta, Hemia nao from wanem hemi impoten blong meksua se ol turisim olsem oli no mas spolem olgeta totel i go moa.

"Ol rul blong wok folem wetem Totel," hemi blong gim save nomo long ol man we oli luk ol totel blong olino mekem eni nogud samting long ol totel mo oli lukaotem gud olgeta, olsem ol totel save kam plante long fuja. Ol turisim opareta oli gat responsibiliti blong meksua se ol turis we travel kam long Vanuatu, oli stap sef oltaem. Be ol opareta ia oli mas tinkbaot tu blong lukaotem gud ol naturol risos ia we save stap pulum turis blong stap kam oltaem mo meksua se wanem samtink oli stap mekem blong turisim ino spolem olgeta risos ia. Sapos yu distebem ol totel mo mekem olgeta oli harem nogud, i save spolem olgeta mo jenisim ol fasin blong olgeta long saed blong kakae, silip, mekem bebe, mo mekem nes. Mo jenis ia i save spolem nogud stetes blong konsevesen blong ol totel.


Stret fasin blong wok wetem totel mo ol rul blong wok folem ino blong ol turisim opereta nomo we oli stap mekem ol tua blong lukluk ol totel. Beh Hemi blong evri kaen tua we ol turis oli save luk totel taem oli stap daeva, pul lo kenu, ron long bot, wokbaot long ol sanbij, o eni narakaen aktiviti long solwota o sanbij. Hemi blong evri turisim bisnis we oli stap wok wetem turis kolosap long solwota olsem ol man we oli stap karem ol turis krosem solwota olsem ol wota taksi from se totel i save kam kolosap long sor o mekem nes blong olgeta.

"Ol rul blong wok folem wetem totel" hemi ol stamba tingting blong stret fasin blong wok wetem ol totel. Be yu we yu wok wetem ol turis, yu mas meksua se ol wokman blong yu mo ol turis oli folem ol rul ia, olsem bae ol man mo ol totel oli stap sefoltaem




Smol advaes/ jenerol advaes

- ▶ Yu mas meksua se ol kastoma blong yu oli save long “Ol rul blong wok folem wetem totel.”
- ▶ Yu olsem wan ona blong wan ples blo turis mas meksua se ol turis oli rispektem mo folem ol rul ia. Hemia i inkludum ol turis we oli pas long sor long graon blong yu blong go long solwota mo tu olgeta we oli stap long ol bot o mekem eni samting long solwota.
- ▶ Yu mas talemaot mo letem ol turis oli save ol rul ia bifo yufala statem eni tua o bifo oli go long solwota o ol sanbij we totel e stap mekem nes long hem.
- ▶ Taem yu stap talemaot ol rul ia, meksua blong tokbaot tu ol signal blong mekem taem wan man i luk wan totel mo wanem nao ol turis oli mas mekem blong meksua se olgeta mo ol totel oli sef. Ol wokman blong yu tu oli mas save ol signal ia.
- ▶ Yu mas meksua se ol wokman blong yu oli save mo oli rispektem ol rul ia. Jekem oltaem se oli save mo meksua blong trenem gud ol niufala wokman taem oli stat wok.
- ▶ Sapos bisnis blong yu hemi karem ol turis blong go luk ol totel long solwota, yu mas gat wan permit long departmen blong turisim blong mekem tua ia. Mo tu yu mas meksua se yu trenem gud ol wokman blong yu blong folem ol rul ia oltaem.
- ▶ Sapos yu stap long bot o long solwota wetem ol turis mo u luk wan totel, meksua se yu no stap wetem totel ia moa lo 30 minit. Sapos yu stap wetem wan totel longtaem tumas, yu save mekem hemi harem nogud mo spolem hem.
- ▶ Taem ol turis oli luk totel, bae oli wantem tekem foto o video blong tingbaot taem ia. Taem oli stap tekem foto o video blong totel, plis meksua se oli tingbaot mo rispektem ol rul long saed blong totel: no traem blong go kolosap tumas mo spolem totel blong karem wan gud “selfi” o Tiktok. Hemi impoten moa blong lukaotem ol totel mo meksua se ol turis tu oli sef.




Ol aktiviti long solwota – swimswim, snorkel mo daeva



- ▶ Meksua se yu mo ol wokman blong yu oli save gud ol rul blong folem taem yu stap long solwota wetem ol total.
- ▶ Letem ol turis oli save oltaem blong oli no mas swim go kolosap tumas long ol total. Yumi no wantem ronemaot ol total blong yumi. Sapos ol man oli mekem olgeta i fraet tumas, bae oli nomo wantem stap kambak long ples we yumi save stap luk olgeta longem. Be sapos ol total oli harem se oli sef nomo, bae oli kipim ol stret fasin blong olgeta nomo mo bae ol turis oli save luk olgeta long solwota ia evritaem.
- ▶ Wan wokman we oli save gud ol rul ia i mas stap oltaem long solwota wetem ol turis taem i gat total i stap kolosap.
- ▶ I no mas kat 4 o moa turis mo 1 wokman we save stap kolosap long wan total mo oli mas stap 3 mita longweoltaem. 3 mita hemi longwan olsem ful bodi blong 2 man.



- ▶ Sapos i gat 5 man finis oli stap long 10m kolosap long total, ol naraman oli mas stap 20 mita longwe long hem.



- ▶ Ol man oli no mas raonem wan total mo blokem rod blong hem blong save ronwe, oli mas gim spes blong hem i save ronwe. Meksua se ol turis oli folem ol rul ia.
- ▶ Sapos wan total i stap soem se hemi no glad o i fraet (olsem hemi wantem ronwe long yu), bae yu mas meksua se ol turis oli no ronem hem mo leko i swim i go.
- ▶ Talem long ol turis se oli no mas tajem o gim kakae long ol total.



Tua long sanbij blong ol nes blong total

- ▶ Letem ol kastoma blong yu i save oltaem bifo we oli go long sanbij blong nes blong total ol stret fasin blong mekem sapos i kat wan total i stap mo oli mas save gud "Ol rul blong wok folem wetem total", impoten wan hemi ol protocol blong luk ol total we oli stap mekem nes blong olgeta. Hemi wok blong yu blong meksua se ol turis oli folem ol rul mo protocol ia.
- ▶ Plante taem ol turis we oli kam long Vanuatu, oli no save ol stret fasin blong wok wetem ol animol blong yumi. Taem yumi talem ol rul ia long olgeta mo letem olgeta save moa long saed blong total, yumi save meksua se ol total mo ol turis oli stap gud mo sef oltaem. Hemi impoten bigwan se yumi no distebem ol mama total taem oli kam sor blong putum ek blong olgeta. Yumi mas lukaotem gud olgeta olsem bae yumi save gat moa total long fuja.
- ▶ Karem ol smol grup blong turis nomo blong go luk ol sanbij blong nes blong total. Wan wokman i save karem 5 turis wetem hem be no bitim namba ia. Hemia blong meksua nomo se yumi no distebem ol mama total we oli wantem putum ek, mo hemi moa isi blong wokman i save lukaotem wan smol grupolsem.



- ▶ I moa gud blong sendem wan wokman i wokbaot long sanbij blong lukaotem ol mama total, be hemi no mas singaotem ol turis i kam bifo we total i wokbaot long sanbij blong mekem nes blong hem. Ol mama total oli save fraet sapos oli luk ol man i stanap long sanbij mo bae hem i nomo wantem kam sor.
- ▶ Hemi gud blong yu save ol stret fasin blong ol total we stap kam sor long sanbij blong yu, mo hamas total yu save stap luk long wanem kaen taem longnaet. I gud blong talem ol kaen informesen ia long ol kastoma blong yu, olsem bae oli save se oli no save luk wan total evritaem nomo be sapos oli laki, bae oli save luk wan.
- ▶ No stap long ol sanbij longtym tumas lo naet, limitim time blong lukluk ol mama total long 3 aoa nomo afta long sunset. ol mama total oli save fraet sapos oli luk ol man oli stanap long sanbij mo bae oli nomo wantem kam long sor. Be sapos yufala wokbaot eli long naet nomo, bae i save gim janis long ol total we oli bin fraet blong kam putum ek blong kam bak pakeken taem i nomo gat man long sanbij.



Lukluk ol bebe totel

- ▶ Letem ol kastoma blong yu i save bifo we oli go long sanbij blong nes, ol stret fasin blong mekem taem oli luk ol bebe totel oli kamaot long sanbij mo oli mas save gud "Ol rul blong wok folem wetem totel", impoten wan hemi ol protocol blong luk ol bebe totel. Hemi wok blong yu blong meksua se ol turis oli folem ol rul mo protocol ia. Hemi impoten tumas se ol bebe totel oli save kasem solwota mo yumi no mas distebem wokbaot blong olgeta. Yumi mas lukaotem gud olgeta olsem bae oli save kam bigwan mo yumi save gat moa totel long fuja.
- ▶ Sapos yu luk wan bebe totel i fas long wan samting o hem i no folem stret rod blong i save kasem solwota, wan wokman nomo hemi save muvum totel ia. Traem muvum hem aot long ples we hem i fas longhem ia o muvum hem go long wan ples we hemi dak blog hem i save faenem bak rod blong hem wan. Hemi moa gud blong yu karemaot ol samting we i fas blokem rod blong hem, olsem bae yu no holem totel. Yu mas tingting gud fastaem bifo we yu go blong elpem ol bebe totel from se hemi save distebem olgeta mo spolem wokbaot blong olgeta blong oli save kasem solwota.
- ▶ Sapos we ol bebe totel oli wokbaot gud nomo, yu no mas holem olgeta blong soem long ol turis.
- ▶ Ol turis oli no save holem ol bebe totel. Sapos oli luk wan i fas nogud o hemi lusum rod blong hem, oli mas talem long wan wokman from olgeta nomo oli save holem ol totel long kaen taem olsem.
- ▶ Meksua se yu mo ol kastoma blong yu no yusum ol laet mo toj we saen bigwan tumas. Sapos yu nid blong karem wan laet wetem yufala, karem ol toj we oli gat red laet nomo. Sapos yu gat wan tua blong luk ol mama totel putum ek blong olgeta o blong luk ol bebe totel oli kamaot long sanbij, bae hemi gud sapos yu pem ol torch wetem red laet blong ol kastoma blong yu i save yusum o rentem. Be hemi gud blong no yusum tumas laet long naet.
- ▶ Yu no mas kipim ol bebe totel, sapos yu luk se oli sik o nogud, hemi no blong yu yu karem olgeta blong stap wetem yu. Ol bebe totel oli mas wokbaot long sanbij blong kasem solwota mo swim i go long dip ples blong save yusum smol kakae ia we mama totel i putum long bel blong olgeta. Sapos wan man i stopem wokbaot blong olgeta, hemi save spolem totel ia mo bae hem i nomo save swim i go longwe. Mo tu, ol bebe totel oli mas save tingbaot sanbij we oli kamaot long hem from taem oli bigwan oli save kambak bakegen blong putum ek blong olgeta.

Lukluk ol totel long skae kam daon

- ▶ Sapos yu stap flae long wan plen o wan helikopta, yu no mas flae kam daon tumas beh stap 300 mita antap long totel. Ol plen mo ol helikopta oli save mekem bigfala win, noes, mo sado we i save mekem ol totel oli fraet mo mekem ol fasin blong olgeta i jenis.
- ▶ Sapos yu stap flae long wan helikopta yu no mas stap antap long totel. Bigfala win, noes, mo sado blong helikopta i save distebem ol totel mo bae oli ronwe mo tu hemi save stopem olgeta blong finisim wanem oli stap mekem olsem stap kakae.
- ▶ Sapos yu stap yusum wan dron, tingbaot gud se yu mas folem ol rul blong yusum dron long Vanuatu.



Ol hotel, risot mo bangalow we oli stap kolosap long ples blong total

- ▶ Bifo we oli mekem wan niufala ges haos o hotel kolosap long wan impoten ples blong ol total, i mas gat wan ful "Environmental Impact Assessment" (EIA). EIA ia i mas talem aot sapos we haos o hotel ia bae i spolem ol total mo ples blong olgeta. Samtaem bae hemi gud sapos oli mekem EIA ia wetem wan man we i save gud ol samting long total, olsem bae hem i save talem gud tingting blong hem.
- ▶ Bifo we oli statem konstraksen, meksua se evri pemit i stap finis olsem wan "Environmental Permit" mo wan "Forshore Development Permit". Folem gud ol rul blong ol pemit ia.
- ▶ Sapos yu wantem putum wan samting blong blokem solwota taem i kam antap, traem blong yusum ol samting olsem ol hip blong sanbij o planem ol wud o kras. Sapos wan total i luk wan bigala samting olsem wan wol we i blokem solwota, bae i save stopem total blong kam long sor mo putum ek blong hem.
- ▶ Ol laet we oli saen bigwan tumas hemi nogud blong stap long ol sanbij we kat nes blong ol total longhem. Yu mas tinktink gud fastaem se ol haos we bae oli stap kolosap long sanbij ia bae oli no mas mekem bigfala laet tumas .
- ▶ Folem ol rul ia blong meksua se ol total oli no fraet blong kam sor long sanbij.
- ▶ Hemi gud sapos yu putum ol saen wetem ol rul ia kolosap long sanbij long ol ples blong total.




Turisim mo kastom long saed blong total

Taem yu yusum kastom blong Vanuatu insaed long turisim blong ol total, hemi save mekem tua i kam moa gud. Sapos yu wantem mekem olsem, hemi impoten blong toktok fastaem wetem ol jif mo ol nara bigman we oli save gud ol kastom bifo we yu yusum olgeta kastom ia, mo meksua se oli talem se i stret blong yu save mekem. Sapos yu salem eni atwok, handikraf o ol storian blong total long tua o geshaos blong yu, meksua se yu talem gud ol nem blong ol man we oli mekem mo yu mas pem gud olgeta.

Konsevesen blong total long saet blong turisim long Vanuatu

Turisim hemi save helpem konsevesen blong ol total o hemi save spolem ol total. Plante long ol turis oli wantem help wetem konsevesen blong ol total mo sam bae oli pem blong save mekem wok ia. Bifo we yu wantem mekem wan turisim prodak long saed blong konsevesen, hemi impoten blong planem gud kosevesen projek blong yu. Yu mas meksua se projek ia hemi mekem ol gudfala samting mo hemi lukaotem gud ol total mo ol nara animol. Ol projek blong konsevesen oli blong mekem wetem wan NGO o wan man we i save gud ol samting blong total. Hemia hemi impoten bigwan sapos sam long ol aktiviti blong projek ia hemi blong wok wetem ol total. Mo tu yu mas kat wan permit blong kavman blong Vanuatu blong save mekem ol kaen aktiviti olsem.



Ol nogud fasin blong turisim long saed blong totel

Holemtaet ol totel blong turis i save luk: Taem yu holem wan totel blong smol taem nomo o blong longatem moa, yu save mekem hem i harem nogud. Hemi no stret nomo blong holemtaet wan totel blong ol turis oli save luk hem kolosap. Hemi agensem loa blong yumi blong save hometaet wan totel– hemi no mata sapos yu holem blong smol taem nomo.



Putum ol totel long wan fence o stopem olgeta blong save swimaot hemi no wan gudfala turisim prodak. Hemi save mekem animol i harem nogud tumas, mo spolem olgeta blong nomo save mekem ol stret fasin blong olgeta. Namba blong evri difren kaen totel long wol ia hemi stap go daon mo taem yumi mekem oli harem nogud o spolem ol totel blong yumi, bae i save spolem namba blong populesen blong totel raon long wol. Hemi agensen loa blong holemtaet o kipim ol totel long Vanuatu.



"Head starting" (wok blong holemtaet ol bebe totel kasem wan yia olsem, taem we oli bigwan long age blong 12 manis olsem afta oli jes leko ol totel kobak long solwota). I kat fulap infomesen mo pruf i stap blong soem se "head starting" hemi save spolem ol totel mo stopem ol stret fasin blong olgeta. Mo tu, i nogat pruf blong soem se kaen fasin olsem i save helpem ol populesen blong ol totel. "Head starting" hemi no wan gudfala turisim prodak.

Holemtaet ol totel we oli sik o oli kasem kil: Ol totel ia oli save stap nomo wetem wan dokta blong ol animol we hemi gat save blong lukaotem gud olgeta. Sapos yu stap soemaot ol totel we oli sik o gat kil long ol turis, hemi save mekem ol totel ia harem nogud mo bae i stopem hem blo kam gud hariap. Hemia hemi no wan gudfala turisim prodak. Mo tu, i nokat wan ples blong putum ol animol we kasem kil o sik yet long Vanuatu. Beh Tingbaot se hemi agensem loa blong yumi blong holemtaet ol totel. Sapos yu faenem wan totel we hemi sik o kasem kil, talemaot long olgeta blong Vanuatu Fisheries Department.



Ol loa blong Vanuatu hemi protektem ol total

Fisheries Act (2014) hemi protektem evri kaen total we I stap long Vanuatu. Rekulesen 59 hemi talem se yu no mas kilim, spolem, kakae, salem, pem, o ekspotem eni kaen total, bebe, jufenael o ol bigfala total. Hemi talem se yu no mas karem, holem, salem, pem o ekspotem ol sel blong total. Hemi talem se yu no mas distebem ol nes blong total, ol mama total, mo yu no mas karem mo kakae o salem ol ek blong total. Hemi talem tu se yu no mas holemtaet mo kipim ol total. I kat wan provisen blong Direkta blong Fisheries Department we hemi save gim wan eksepsen long saed blong kastom, edukaesen, o risej.

Eni man we i brekem loa ia bae hemi save faen kasem VT200,000. Sapos wan bisnis hemi brekem loa ia hemi save faen kasem VT1,000,000.

Sapos yu mestem yu mekem kil long wan total o yu kilim e ded, yu mas talemaot hariap long Vanuatu Fisheries Department. Kolem +678 23119 o +678 5333340. Sapos yu luk wan total we i sik, o gat kil, o i ded, yu mas talemaot long Vanuatu Fisheries Department, Wan SmolBag Vanua Tai kodineta (Donald James) long +678 7772613 o +678 5419965, o Vanuatu Environmental Science Society long emel vess@vanuatuconservation.org

Sapos yu gat wan bisnis o tua blong luk ol total, yu mas gat wan turisim pemit blong mekem tua ia. Sapos yu savewan bisnis o tua we oli nogat pemit o oli no stap folem ol rul ia, yu save talemaot long Department of Tourism lo +678 33400 mo askem blong toktok long ofisa blong minimam standed.

Sapos evri man we i gat turisim bisnis long Vanuatu i folem gud ol "Stret Fasin blong dil wetem Total – Ol Rul blong wok folem long saed blong turisim", bae yumi hop se ol naesfala total blong yumi ia bae oli save hapi, helti, mo gohed blong aktraktem plante moa turis blong kam long Vanuatu long fuja. Mifala i hop se taem yumi folem gud ol rul blong lukaotem ol total bae yumi mekem ol turis mo ol total tu oli harem gud. Yu save mekem i kam moa gud sapos yu o ol wokman blong yu, yufala save moa long ol total. Hemi impoten blong save laef blong olgeta, ol denja we oli stap fesem, mo wanem blong mekem blong lukaotem gud olgeta. Yu save talemaot ol infomesen ia o soem long ol turis blong yu blong meksua se oli enjoem taem blong olgeta mo long semtaem tu leftemap save long sae blong ol spesel animol ia, i no long Vanuatu nomo be raon long wol.

Appendix

Ol risos blong turisim wetem total mo eksampol blong ol gudfala fasin blong mekem turisim blong total i stap gud.

Ol skul online mo ol korses:

Olive Ridley Turtle Projek i ofarem fri online korses long ol jeneral infomesen blong ol total mo saens mo kosevesen blong ol total.

<https://oliveridleyproject.org/e-learning>

Sea Turtle hemi wan Ameriken oganisesen we i konektem pipol wetem total. Oli gat: Ol risos blong edukesen mo tu ol day blong World Sea Turtle Day.

<https://www.seeturtles.org/sea-turtle-education>

Yusum QR kod ia
blong luk ol rul ia long
websaet blong Vanuatu
Environmental Science
Society.



Publikesen ia hemi mekem blong Vanuatu Environmental Science Society wetem sapot blong European Union. Kontent blong hem hemi wok blong SPREP BioScapes Programme nomo. Loa blong European Union i no stap insaed long hem.